

裡塘志略

中國民族史地資料叢刊之五（內部參攷）

裡塘志略

中央民族學院圖書館編

一九七八年十月

序

西藏裡塘志略兩卷。友人陳秋坪所著也。秋坪與余少同學相親善。余喜其性情瀟灑。能讀書工吟詠。旁及書畫。古所稱風流名士。庶幾近之。以乙科屢困公車。往返六上。無牢愁意。猶與朋好杯酒過從。無間晨夕。蓋其天懷曠達。素所蓄積然也。歲丁未。預大挑。分發蜀中。所至留心吏治。能聲丕著。嗣補青神令。調辦裡塘糧務。裡塘古三危地。僻陋在夷。秋坪力為整頓。考其山川夷險。民生利弊。土司沿革。詳為記載。而著於編。考勸保陞補。江右建昌司馬。丁卯以憂歸里。訪余於別墅。頭童鬢白。頽然一翁。向之瀟灑性情。銷磨殆盡。豈仕途之能困人有如此耶。願秋坪以薄宦遠游。予以樸拙林守。契闊二十餘載。天涯海角。徒有室迺人遠之思。一旦老年聚首。歡洽生平。實可追步當日杯酒過從之樂。而秋坪

乃以囊橐蕭然。不免江湖覓食。抵家逾月。即受師席之聘。遂適清源。瀕行出是
編相示。余受讀之。見所未見。如覽穆天子傳。披山海經圖而詳。其考據古今。指
陳利弊。粹然於吏治民生有所裨益。則又非睽車鬼國諸書得同日語。是不可
以不傳也。因授之剞劂氏。愚弟高城序。

裡塘志略目錄

卷上

建置

形勢

疆域

山川

津梁

塘鋪

職官

夷職

卷之五

卷之五

兵制

土兵

貢賦

土官

寺廟

喇嘛

天時

土則

城市

物產

風俗

卷下

雜記

裡塘志略卷上

閩中陳登龍秋坪編

建置

裡塘古危地。禹貢導黑水至于三危。入于南海。聖祖仁皇帝上諭。三危者。徼中國之三省也。打箭爐之西南。達賴喇嘛所屬。拉里城之東南。為喀木地。達賴喇嘛為危地。班禪呼圖克圖所屬為藏地。合三地為三危耳。裡塘居打箭爐之西南。拉里城之東南。正古三危地。昔隸青海和碩氣部。我朝定鼎後。率土奉貢賦。遂立大喇嘛寺。掌管。闡講黃教。名曰堪布。為一方崇奉之尊。僧俗營官各一名。董率其衆。康熙五十七年。獲軍統領溫晉。副將趙宏基等。帶領滿漢官兵。征西藏。蒙款多布。由打箭爐出口。渡雅龍江。直抵裡塘。駐扎。宣諭聖朝威德。綏定。

人心預貯倉庫錢糧。待大兵西進。五十八年定。西將軍噶爾弼駐兵打箭爐。前鋒都統法納先領官兵前進。道經裡塘。□□海差達哇朗章已及二營官至營。擒以正法。革去堪布官。遂有逆意。大兵甫駐。計誘達哇朗章已及二營官至營。擒以正法。革去堪布喇嘛。於是裡塘頭人百姓咸凜軍威。各舉素相悅服之人。議立堪布。並正副營官。開造本營大小堡寨十五處。頭人三十名。百姓五千三百二十戶。大小喇嘛寺院四十五座。喇嘛三千二百七十餘。眾傾心投誠。輸納貢賦。承應差使。而附近裡塘之反述崇喜毛了毛茂了長坦曲登五處酋長。亦各呈戶口上納糧馬革面來歸。雍正七年。頒給正副營官印信。俗營官安本授為宣撫司宣撫使。僧營官康卻江錯授為副土官。照流官例鈐束地方。反述崇喜酋長杜納特吉。毛了酋長索朗羅布。長坦酋長側冷。曲登酋長康珠。俱授為長官司。毛茂了酋長

側冷工授為土百戶。世代承系。各給印信號紙。永為藩籬。按裡塘自大禹治水以後。經傳無聞。唐時始為吐蕃所有。東窺黎雅。兵革頻興。屢疲中國。故其地為外患首區。宋藝祖鑑前代之失。以玉斧斷大渡。以西棄之。厥患寢息。然猶茶馬互市。時啓爭端。終宋至明。駕馭羈縻。未嘗內附。我國家撫有四海。西域一帶。萬有餘里。輸誠納貢。盡入版圖。裡塘雖蓋部。然最近內地。仁漸義摩。較之他處。為易入。於以見聖朝道一風同之治。稽之往古。莫有及者。於戲盛矣。

形勢

裡塘在四川布政司西一千六百七十里。通志稱其東接西爐。南通寧遠。西距巴塘。北連瞻對。層巒疊嶂。亦西藏之要區。然審其大勢。為中國之藩籬。則險而足恃。為一方之保障。則散而難守。其地山嶺雖多。而少巔巖之勢。平坡蔓衍。道

途四達。無要可扼。且西北一帶。境連三廳。對姑隴卡。述林喀寺。額隴。疊爾格等處。其人皆操悍好鬥。飛馬馳驟。履險如夷。往往出沒境內。肆情劫奪。拒之匪易。守之為難。忠信子及豚魚。是在守土者有以化之。俾知朝廷威德。自弭其暴虐。乎其可也。

疆域

裡塘疆域遼闊。縱橫二千餘里。東至雅龍江三百二十里。強。交打箭爐界。西至二郎灣二百四十里。強。交巴塘界。南至噶杓五百里。強。交雲南中甸界。東南至拉空頂。四百里。弱。交寧遠府界。北至旌熱泥。四百里。強。交瞻對土司界。轄大小鄉村三十六處。曰戎里馬。曰燒骨中。曰安角中。曰擦嗎中。曰拉通中。曰擦竹溪。曰俄落。曰河口。曰上俄落。曰下俄落。曰呀爛。曰疊雜。曰上年納。曰下年納。曰甲

中曰中壩曰藏木曰沙魯布曰木喀曰喇爾布曰工噶里曰島巴曰鄉城曰杓
朱曰喇嘛了曰二郎灣曰立登三巴曰丁壩曰宗巴曰普恩噶土官黑帳房毛
了土官黑帳房曲登土官黑帳房奔拉山土官黑帳房

山川

口外蠻荒山重水惡。曷足登地輿之志。然環拱輔翊。周流映帶。以成一方之勢。
為中國壯規模。亦可企望數之者。洲渚嶽峙。隨地皆然。舉其凡為荒裔留勝
蹟焉。裡塘北曰峻麼拉卡山。北之左曰雜哈拉貢山。北之右曰嗎雅山。三山環
列如屏。聯絡不斷。長青春科兒寺坐其麓下。伸一阜。民居盤結其上。遠望如游
龍蟠屈。華言雲龍山。蓋裡塘之大氣脈也。南面曰梭龍山。又名尖山。俗呼喇嘛
帽山。蠻言置頃也。縣延五十餘里。數峯蒼秀如蒲葢初苞。土人以其形肖喇嘛

帽故名。東曰珠水拉卡山。又東曰紫木喇山。又東曰出喇山。又東曰什巴頂山。又東曰赤喇岡山。又東曰達俄岡。又東曰日工達山。又東曰俄洛山。又東曰撥浪工山。又東曰剪子灣雪山。又東曰麻蓋中山。西曰阿喇柏桑山。又西曰喇枯山。又西曰色勒隆宗山。又西曰額東勒山。又西曰海子山。有上中下三海子。上海深沈黝黑。波濤汹涌。中有神物潛焉。隆冬不凍。中海稍淺。下海潦長旱乾亦名乾海子。又西曰喇嘛山。又西曰二郎雪山。山最奇。三峯鼎峙。各圍百里。直上十霄。四時積雪不消。遠望如瑤臺。三峯又曰三巴山。在東西十餘山皆根險頂夷。氣勢雄博。乃進藏大道。夏多雨雹。冬多風雪。行旅頗難。其附東者曰咱噶山。曰蟒拉山。甲噶山。附於西者曰額曰奔松山。皆峻拔不易扳躋。其餘四鄉在甲中者。有喇布山。在藏木者有藏木山。在疊雜者有疊雜山。在毛

茂了者有打山。在曲登者有毛了山。在沙魯布者有沙布山。交曠對界者曰窮藏山。交雲南界者曰漳喇山。山甚峻險。上下約百餘里。山之左屬裡塘之鄉城。山之右屬雲南麗江之中甸。裡塘之水。一曰雅龍江。在塘東三百里。與打箭爐東西為界。源出青海之娘錯。流入霍耳咱地。□□攷歷上中下三渣壩。由寧番三渡水會金沙江入馬湖江。至敘州府歸川江。一曰裡楮河。源出反述長坦歷蒙了沙。如東南流經裡塘至眉里喇卡合雅龍江。一曰立渠河。發源射鹿山流與雅龍江合。一曰色隆達河。在塘西。源出額東額山。流繞雪山根合袁達楮河。由喇嘛了至鄉城入金沙江。一曰喇梯楮河。源出立登三巴。流經二郎灣博莫勺朱入金沙江。

津梁

裡塘為進藏衝途。河道孔多。必須津梁以濟。故郵政重焉。中渡在塘東三百里。打箭爐出口大道。渡用木船。皮船。木船官渡。皮船民渡也。下渡在塘東南。渡用皮船。路通會盟營。木里土司。及雲南中甸。熱藏大橋在塘西三十里。八濟橋在喇嘛了。桑巴橋在立登三巴。漢人橋在大竹卡。倫都橋在呀壩。唐甲橋在甲中。喇布橋在喇爾布。谷藏橋。賽橋在鄉城。阿了橋在丁壩。

塘鋪

裡塘山川險惡。道路遼遠。盜賊出沒無常。戍守瞭望之區。與夫羽檄傳遞之所。最為慎重。計塘鋪十三處。步遞馬遞。暨漢土官兵駐守。至備且密。國家設法之嚴如此。底塘東路計六塘。麻益中塘。剪子灣塘。撥浪工塘。西俄洛塘。咱嗎拉洞塘。火竹卡塘。底塘西路亦六塘。額凹奔松塘。海子塘。喇爾塘。喇嘛了塘。二郎灣

塘立登三巴塘。

職官

口外戍臺文武官弁。由四川總督揀放達部。必選其才力精壯。熟悉夷情者任之。三年一換。庶屬刻之。責誠重也。裡塘糧務官一員。派州縣官管理。供應差務。鈐轄土司。支放漢土官兵糧餉。守備一員。統領漢土官兵。防守地方。查緝盜賊。把總二員。一駐裡塘。支放官兵糧餉。稽查往來摺報文書。協守西路一帶汛地。一駐火竹卡。協守火燒坡至什巴頂汛地。外委二員。一駐撥浪工。協守什巴頂至剪子灣汛地。一駐中渡。協守剪子灣至卧龍石汛地。

吏職

宣撫司一員。副土官一員。土都司一員。土守備四員。土把總二員。辦事兼巴四